

四庫全書

集部

欽定四庫全書

文苑英華卷五百六十八

宋

李昉等編

賀捷三

賀臬戮叛將楊惠琳表一首

賀收劔門表一首

代李侍郎賀收成都表一首

賀破賊表一首

賀捉獲劉闢等表一首

代李尚書賀生擒李錡表一首

賀收蔡州表一首

賀誅吳元濟表一首

賀平淄青表一首

爲宰相賀殺賊表一首

賀汴州誅李介表一首

賀平党項表一首

賀生擒衡州草賊鄧裴表一首

爲滎陽公賀幽州破奚寇表一首

賀臬戮叛將楊惠琳表

憲宗

楊於陵

元和元年

臣某言臣得當道進奏官高振報夏州叛將楊惠琳庸  
賊匹夫克頑習性憑依壁壘竊弄干戈陷我邊鄙之人  
將流蜂蠆之毒伏惟陛下道包覆育一作載威貫風雷乃  
命戎人恭行討罰文告纔布已見其携離天誅未加倏  
從於臬戮革車不頓餽餉靡勞宸筭不遺於指蹤王師  
蓋本於無戰雖巴庸醜類樂禍一隅顧其巢幕之危因

同破竹之勢妖氛坐掃仁壽可期臣職忝藩條任分師  
旅遠承慶捷倍萬恒情無任踴躍之至

賀收劍門表

憲宗

臣某言伏見正月二十九日制書以劉闢擢於非次授  
任節旄不立朝章擅有侵軼詔命左右神策行營節度  
使高崇文領馬步將士嚴礪李庸等計會討伐臣又得  
上都進奏院官高振報嚴礪下告捷官嚴公貺奏正月  
二十二一作三日收復劍門破賊五千斬偽授劍州刺史

武德昭訖又夏州叛將楊惠琳援絕城孤勢窮力屈王  
師進襲計已尅平凡在遠邇不勝慶幸某中賀伏惟皇帝  
陛下誕敷玄德廣被文明寰海又寧戎夷款附蕞爾狂  
狡敢縱姦克藉方伯任用之資乘軍城變故之際阻兵  
拒命肆虐讐言鄰陛下志在安人尚爲含垢頃令申諭許  
以自新誠宜改過感恩迷而知一作非復而乃恣情干紀  
長惡不悛既慝稔而禍盈俾人怨而神怒今戎臣授律  
睿畧遐宣迫脅者知有所歸忠義者得以自効因利乘

勝倚角攻驅固無遺鏃之勞佇見輿尸之變臣忝職藩服授任偏師憤激之誠倍百常品無任踴躍之至

代李侍郎賀收成都表

憲宗

呂

溫

元和元年

臣某言伏見高宗文奏以九月二十二日官軍入城都府逆賊劉闢走出見勒兵追捕者臣聞夏震秋落乃觀成物之功善陣有征方見勝殘之理然則殺之所以生之也動之所以綏之也氣和則歲功早就德盛則廟筭先期無遺鏃而巨盜集作魁窮奔不血刃而全蜀底定奔

走夷裔鼓舞生靈騰瑞氣而躍祥風披慶雲集作霄而捧

白日中賀伏以陛下纂臨宸極惟新庶政拓跡開統之始

作法定制之初而賊闢敢犯天威首干大紀恃嶮與遠

窮兇極暴雖禍淫助順誠天道之必然而致勝舉全皆

聖謨之自出諸軍既集鋒鏑爭先陛下以爲方暑用兵

觸冒害氣與勦人而欲速寧全衆以集作而功遲遂令緩

螻蟻之誅抑貔貅之銳休養磨礪以須秋期由是感恩

而思奮者萬心如一又高崇文疾惡太甚殺傷小一作少



過陛下推弔伐之義弘覆燾之慈狂寇

集作寇逆

是誅吾人

何罪遂令逐北者生致爲上脅從者獲則捨

集作免

之且

諭鴻私仍加宴慰由是飲澤而向化者十室而九加以

聖慈曲被大信有孚當挾纊之時賜戰士悉出內府開

食黠

集作榘

之路賞降者曾不踰辰遂使昏迷革心義勇

增氣江山自拔雷雨長驅渠魁假息而逃威士衆順風

而捨仗市不易肆巷無驚犬人蒙骨肉戶解倒懸旌旗

導長養之風金鼓動發生之氣然後知至仁能殺睿略

無方大典用彰神武可畏全苞形器某作氣之內有罪必  
誅旁行天地之間無思不服臣謬膺重寄親奉昌期坐  
觀氛授之清目覩鯨鯢之戮手舞足蹈倍萬恒情無任  
慶抃之至

賀破賊表

憲宗

張仲素

元和元年

臣某言得度支使李巽與臣委曲報劔南行營官軍大  
破逆賊劉闢事宜伏承自六月十日後鹿頭城下石碑  
谷口前後殺獲已僅三萬餘人今月六日又於鹿頭城

下殺賊二百餘人兼奪得一柵東川節度使高崇文便  
於城下頓軍又西川賊於鹿頭城投降都虞候郝同美  
說賊城精兵不下數百人其餘一二千悉是子弟鹿頭  
城內人心亦甚危懼計即投降又官軍出戰賊衆大敗  
殺傷欲盡者伏以逆賊劉闢愚狡狂童稔蓄兇慝脇帶  
州邑依阻城池背誕皇恩自貽赤族陛下曲垂弘貸念  
彼遠人此賊敢肆拒張恃茲薄戍望其悛革又已稽誅一  
興貔虎之師果盡螳螂之衛今則神人共怒覆載不容

王師鼓行窮寇席卷傾枳棘之巢待擒妖鳥決潢汙之水以捕涸鱗揚旆整戈指期剪滅此實聖德遐被神武昭宣岷蜀清寧當候旬日凡在臣子孰不歡心某忝荷鴻私謬承朝寄無任慶快之至

賀捉獲劉闢等表

憲宗

臣某言得進奏官報狀伏承九月某日高宗文差馬使鄴定進於彭州界捉到劉闢盧文若并家口等有詔罪劉闢及生擒外餘一切不問西川減放兩稅并割西川

六州與東川者臣聞鬼方不賓高宗用討防風後至夏  
禹行誅自古聖帝明王將欲上平泰階下齊萬國未有  
不先正刑罰後致雍熙者也闢構亂阻兵違天背順聚  
茲蜴蜮固彼幽遐謂天可逃無罪不肆陛下斷於睿略  
興此神兵寇壘妖鋒颯馳電掃顧茲劇賊尚敢退藏同  
惡相携偷生遁孽灌莽雖深豈網羅之能避武夫多力已  
梟獍而同擒萬里喧傳兆人鼓舞刑當磔裂罪合誅夷  
肆市陳原纔攄衆怒自陛下握乾御歷授錄纂圖玉燭

載和金鏡愈朗至於夏州俶擾蜀郡亂常春斬惠琳冬  
擒劉闢神速之效從古所無復霽整旅之威降納汙之  
詔滔天作逆唯罪一身念兩川徭役之勤爰矜賦稅  
割六州版圖之屬以定封疆日月發一作鹿其貞暉山澤  
通其喜氣凡在茲土孰不歡康臣謬沐殊私叨承重寄  
手舞足蹈倍萬恒情無任慶抃之至

代李尚書賀生擒李錡表

憲宗

呂

溫

元和元年

臣某言臣得某官某乙狀報伏承今月十二集作十三日夜

浙西將士張子良將相率効順生擒李錡者天討有罪  
國無稽誅夷夏同歡飛沉咸躍臣某中賀臣聞炎氣方蒸  
伏陰不能藏其沴必疑戰發泄以彰正陽之功至化方  
融大姦無所集作隱其慝必陵犯誅夷以耀聖人之武  
沴不盡消生德不遂姦不盡發聖功不成蓋自然之明  
徵而必至之恒理伏惟皇帝陛下光膺駿命恢纂鴻休  
仁育群生義征不諛無與讓而誕修文德不得已而有  
此武功日者周歲之間大刑再舉朔陞叛將獻首於九

廟之庭益部亮渠伏鑕於萬人之日被髮左衽且猶知

懼肖形含氣孰不革心賊錡身齒人倫家承國

集作宗

籍

三朝任遇五族光輝而獨藏禍謀密聚姦黨梟琳之牙  
旗尚在忽已發狂戮闖之刀血未乾敢茲拒命陛下重

難戎事深懸遠人先示招諭後加討伐方伯嚴兵有司

調食經略繞下形勢已張果得義勇叶心鬼神假手大

旆迴指長戟合圍兵火之氣天運金鼓之聲海動

集作震

曾不終夜遂擒元亮巷有居人市無改肆滔天之逆踰



月而平去歲西征則善陣不戰今茲東伐則善師不陣  
有以見睿略天縱神武日新聖道久而投刃皆虛德澤

深而用力彌寡從此氛

集作災

窮沴盡俗變風移百蠻成

冠帶之鄉五兵爲耒耜之器溥天同軌比屋可封古今

一時堯舜何遠臣謬膺重寄時荷殊恩載

集作再

逢河海

之清三觀鯨鯢之戮志深除惡義切同休歡抃之誠倍  
萬恒品無任手舞足蹈屏營之至謹奉表陳賀以聞

賀收蔡州表

憲宗

劉禹錫

元和十年

臣某言伏見詔書以唐州節度使李愬生擒逆賊吳元  
濟獻俘文武百僚於興安門列班稱賀者天威遠被元  
惡就誅一方既平萬國咸慶中賀伏惟睿聖文武皇帝陛  
下德超邃古道合上玄臨御已來天人協贊削平吳蜀  
掃蕩塞垣車書大同夷狄來貢叢爾元濟敢懷野心輒  
聚犬羊苟偷時月陛下聖謩獨運睿感潛通天助神兵  
人生勇氣既擒亮逆爰集作遂正刑書伏三紀之逋誅成  
九衢之壯觀宗社昭告華夷式瞻行弔伐而在禮無違

烜一作振威聲而何城不克楚氛改色淮水安流漢上疲

人盡霑雨露汝南遺老重覩昇平凡在具臣孰不欣抃

臣久辭朝列忝守遐藩不獲稱慶闕庭陳露丹悃集作憊

仰瞻宸極倍萬群情無任屏營之至

賀誅吳元濟表

憲宗

元稹

元和十一年

臣某言某月得當道節度使牒呈本州稱逆賊吳元濟已就誅斬訖臣某中謝臣聞拯遺眊於溝瀆非聖不能掃餘沴以雪霜非天不可日者神棄申蔡蓄爲汙瀦五十

年間三后貽顧眇爾元濟繼爲堯妖謂君命可逃以父  
死爲利陛下凝茲睿筭取彼堯殘不越殷宗之期遂勦  
淮夷之命威動區宇道光祖宗凡在生成孰不歡抃臣  
忝官藩翰不獲率舞闕庭瞻望徘徊無任踴躍屏營之  
至

賀平淄青表

憲宗

白居易

元和十四年

臣某言伏見二月二十二日制書逆賊李師道已就梟  
戮者皇靈有截睿筭無遺妖氛廓清遐邇慶幸臣某誠

歡誠喜頓首臣聞亂常干紀天殛神誅李師道包藏禍  
心暴露逆節罪滿惡稔衆叛親離未勞師徒自取擒戮  
伏惟皇帝陛下文經天地武定華夷凡是猖狂無不誅  
剪兩河清晏四海會同清平之風實自茲集作始臣名  
叅共理職忝分憂抃舞歡呼倍萬恒品官守有限不獲  
稱慶闕庭無任慶快踴躍之至

爲宰相賀殺賊表

穆宗

臣某等言伏承某道逆賊某年某月某日已被某殺戮

訖皇靈震耀堯孽梟夷率土普天歡呼鼓舞臣某等誠  
喜誠抃頓首頓首臣聞亂臣賊子阻兵干紀者明則有  
天討幽則有鬼誅遲速之間罔不殲殄伏惟文武孝德  
皇帝陛下君臨八表子育群生合天覆地載之德順春  
生秋殺之令宿寇遺孽闇然銷亡四海九州廓然清晏  
逆賊某乙一介賤隸兩河叛人包藏禍心竊弄凶器戕  
害主帥虔劉一作剽掠善良幕燕鼎魚偷活頃刻所謂顛木  
之餘枿座疽之遺種重斧欲加而先折鍼石未攻而自

潰不有弔伐孰知德威不有妖氛孰知神筭則天下之

耳將來

集無此四字

之心有以知順逆存亡其猶影響者也

臣伏以某乙既已斬首某乙將何保身若不乞降即應  
生縛輔之或在車即相依皮既不存毛將安附况我乘  
破竹彼繼覆車止戈之期翹足何待無任喜慶抃躍之  
至

賀汴州誅李介表

元

稹

長慶二年

臣某言臣伏見逆賊李介已就誅夷韓充入汴州訖一

方既定率土無虞凡在臣僚實增歡抃臣某中賀伏以汴

州扼吳楚之津梁據咽喉之要地將驕卒悍易動難安

急攻則越軼

集作逸

是憂緩取則遷延慮

集作易

變自非陛

下盡排群議獨斷宸衷外委將臣中

集作由

敷睿筭風行

號今天助機謀則何以斬此鯨鯢破茲梟獍臣摧亮志

切受國恩深仰荷威靈倍萬常品限以符守不獲稱賀

闕庭無任踴躍屏營之至

賀平党項表

宣宗

杜牧



臣某言伏奉二月二十七日敕党項剪除北邊寧靜華夏同慶道路歡呼臣某誠慶誠抃頓首頓首伏以上天有震耀殺戮王者有攻討誅夷是以不暫費者不久寧不一勞者不永逸伏以自古處夷狄於中華未有不爲患者春秋時長狄攻魯北戎病齊破衛陵燕侵秦撓晉西漢趙充國納先零於內地東朝馬文泉置當煎於三輔自後熾大侵亂關中戰爭十年騷擾四海陵逼京邑發掘園陵段熲不生終不能滅後至曹公因匈奴衰弱分

爲五部處在汾晉散而居之元海傑然首亂華夏中原  
喪沒凡數百年國朝貞觀之初突厥破滅太宗惑彥博  
之利口忽文貞之成筭處其降衆置於河南不數十年  
果殘燕趙興師命將輸穀饋財天下騷然始能殄滅是  
知古今夷狄處在中土未有不爲亂者伏以党羗雜種  
本在河外生西北之勁俗稟天地之戾氣爲西戎所蹙  
舉種來降國家納之置於內地爰受冠帶兼伏征徭角  
觝既成觝觸是務天寶至德之際北燕偏重中原一披

大厯建中之時逆胡餘波巨盜再起党羗因此亦恣猖  
狂兔伏鳥飛爲戎虜之耳目狼心梟響作郊畿之殘賊  
比以回鶻未殄吐蕃正強且須羈縻未可重振於是邊  
疆日駭種類歲繁每至勁弓折膠漣馬免乳以慰健之  
質張忿鷙之亮劫饋穀以焚舟殺輶車而閉道衆虺盤  
結羣犬呌牙依據深山出沒險逕近在宇下游於穀中  
艱難以來不能剝削伏惟聖敬文思和武光孝皇帝皇  
天縱聖赫日資明威極風庭謀先造化潛運睿筭獨決

神機箕宿禡牙狼星斂角戊日禱馬太白揚眉按鎖而  
邊事無遺聚米而兵刑盡見披其要地擣以奇兵獸窮  
搏人鹿急走險囊封赤白雜沓繼來雉走檄書遠近同  
至蘇辛李蔡傅鄭甘陳十萬齊呼四面同入行軍猶枕  
席之上敗虜於阻險之中或以利戈舂喉或以長矛挾  
脅僵屍積疊千山之草木盡腥霆電轟喧萬里之威靈  
大震詩曰不弔昊天亂靡有定此言中國不振蠻夷入  
伐下人號天以告亂也後曰宣王薄伐小雅中興是知

武功不成文德不洽臯陶無遺之戒史佚非類之言若不殄除何爲家國自此兵爲農器革作軒車泥紫金於常山沈殘戎於青海天覆盡得禹畫無遺統華夏爲一家用夷狄爲四守萬物由道百度皆貞遠超三代之風使無一人之虐臣僻左小郡一作非樸櫟散材空過流年徒生聖代尚能爲詩見志作歌極情上詠神功庶垂後代不獲稱慶闕庭無任踴躍屏營之至謹奉表陳賀以

聞

賀生擒衡州草賊鄧裴表

臣某等言伏見湖南都團練使奏生擒衡州草賊鄧裴及徒黨等伏以湖湘早耗百姓饑荒遂有姦克敢圖嘯聚今承擒滅已盡根株臣等誠歡誠忭頓首頓首臣聞三代之英兩漢之盛姦宄亂常之類挺亮構逆之黨乘間即有過隙便生伏以聖敬文思和武光孝皇帝陛下威極風霆德滋雨露正開壽域盡納群生永戢干戈將臻富庶逆賊鄧裴蕞爾小孽敢因艱食漸誘饑人剝亂

鄉間陵驚郡邑徒堅黨合事鉅寇牢或據深山或閉官道遂使湖嶺之外人不聊生慎由指揮義徒總齊武士仰憑睿筭遠仗皇威不經歲時盡剪豺虺項一作兇已寧於朔北妖黨復殄於巴西今擒鄧裴一清湖嶺用夷狄爲四守統華夏爲一家言念秋毫無非帝力臣等備位台鼎日奉聖謀無任慶抃歡呼之至

爲滎陽公賀幽州破奚寇表

臣某言臣得本道進奏官某狀報某月日幽州節度使

張仲武奏破奚北部落及諸山奚除舊奚王匿耶所管  
外殺戮首領丁壯老幼并殺獲牛羊焚燒車帳器械等  
計二十萬刺史以下面皮一百具耳二百隻奚車五百  
乘羊一萬口牛一千五百頭者天聲遠疊廟畧遐宣白  
虜獲於寧臺赤夷俘於燕路臣某中賀臣竊窺舊史迭聽  
前朝有天子憂邊清宵輟寐將軍出塞白首言歸至乃  
或勝或奔一彼一此竟困塞郊之柝那停絕漠之烽猶  
欲叙烈旂常告功祧廟用其斃勝謂曰難能況幽朔巨



都全燕重地存臻奚寇猾亂華人田讓之護

集作獲


鮮卑

莫能深入祭彤之軍遼水唯遣相攻近歲以來爲患滋甚走單于偵邏之路懷駒支漏泄之姦張仲武重感國恩習知邊事同三師而隸楚倂五餌以間戎乘其囂憤之時俄得剪除之便燕犀密掛冀馬潛羈超距投石者動過千群戟手科頭者畧踰萬計坎三鼓而河流自却聲六校而屋瓦皆飛自使馬懼喪林兔忙迷穴無舟掬指有地僵屍未驚紫陌之烏前軍已蹙不啖淮山之鶴

後隊仍窮遂分表尚之頭顱仍裂虫尤之肩髀穹廬落  
燼同甲揚灰山積雲屯大收其車乘角羸耳濕盡獲其  
牛羊柳水載澄桑河無事爰施疑吉語入解皇威此皆

皇帝陛下功格上玄運膺下武授茲成筭于彼當仁震  
肅九圍歡呼萬國昔艱難云始胡塵首起於盧龍今開  
泰有期漢將先清於涿鹿人謀允若靈貺昭然固已  
上慶祖宗下光編策錄圖洪範競三古之殊猷玉檢金  
泥有百神之靈祐臣雖當防遏不介邊陲空增氣於懦

夫實叨榮於下將日園千里天蓋九重奉一月之捷書  
唯知抃蹈獻萬年之壽酒尚隔班行念風水於遐藩寄  
夢寐於宣室無任望闕結戀之至



文苑英華卷五百六十八

欽定四庫全書

集部

文苑英華卷五百

六十九至  
七十一

詳校官給事中臣李臺

助教臣常循覆勘

總校官進士臣朱鈐

校對官中書臣胡紹基

謄錄監生臣陳振興

欽定四庫全書

文苑英華卷五百六十九

宋

李昉等編

雜賀一

○ 爲杭州崔使君賀尊號表一首

賀加天寶尊號表一首

賀冊尊號表一首

爲河南盧尹賀上尊號表一首

賀新樂表一首

爲雍州父老賀鑾駕停幸洛邑表一首

爲何舍人賀於梁王處見御書文表一首

爲常右相賀拜洛表一首

賀納諫表一首

爲秋官員外郎李敬仁賀聖躬新牙更生表一首

賀聖躬痊復表三首

賀聖體平復御紫宸殿受朝賀表一首

爲安平公華州賀聖躬痊復表一首

爲杭州崔使君賀尊號表

武后

李

嶠

延載元年

臣某言伏奉五月十一日制書陛下俯順羣情懋膺大典垂光休於百代被鴻恩於萬族凡在含生孰不慶幸臣某中賀臣聞太朴既謝帝皇之迹已殊聖道不追王霸之風且雜雖崇號廣溢遞享於隆名而德薄政衰不光於神器一作氣伏惟越古金輪聖神皇帝陛下承大雲之法記應滎河之寶籙以天上天下之尊爲隆平太平之主不言而理三階正而六氣調不怒而威萬寓清而

百蠻服延富壽於和平制雍熙於易簡慕義嚮化之黨  
候雨占風疇德瑞聖之符非烟若霧青襟蹈舞於庠塾  
黃髮謳吟於衢路固可使堯舜擁篲禹湯扶輪超塵劫  
而首唱邈梵天而高視豈登三減疑作咸五邁昔殊今而  
已哉嘉號初登殊章備舉鋪帝容而建皇極大寶聿承  
旋乾軸而正坤維洪鑪再造仙渙與祥風俱動湛恩共  
天威並作緩姬文之獄既削爰書錫漢后之醜且班戎  
律覃敷之澤出九掖而浸羣方抃躍之音自三川而周



四海遂乃崇祇肅於梵宇致嚴恭於清廟申寬舉滯而  
有善畢升崇德報功而無文咸秩規模祭而洋溢道德  
紛而布濩豈直朝野稱慶觀美化之維新故亦神祇降  
祥見鴻基之載固臣叨延龜組繆分虎符千年有遇更逢  
開闢之初百辟承歡不預趨馳之末瞻雲路而式作仰  
天庭而載佇踴躍之懷企聳無極無任鳧藻悅豫之至  
謹遣某官奉表陳賀以聞

賀加天寶尊號表

李邕

天寶元年

臣邕言伏奉今日恩旨萬方士庶九土軍戎昭洗宸  
波光被聖渥臣誠歡誠喜載欣載躍頓首頓首死罪死  
罪臣聞沐雨露者草樹自樂荷陶鈞者動植皆春故知  
則而衆之守而行之所謂則天之明立人之極有慶斯  
大無得而名者也伏惟陛下尊崇聖祖肅恭道教子物  
天德序位代工惣三五之妙勲統億兆之全業戈甲謐  
息華戎底平故得真容慶應潛通帝夢寶符靈貺允叶  
神心加號所以發祥郊天所以昭報大禮盛事光赫旬

時作解周仁廓開宇宙天稟

類表作京

褒稱雲紀變名風物光

華再馳暉於日月河山保界重賦質於乾坤同一氣之

速

類表作建

初與四時而浸遠天長地久呼萬歲於太平國

秦朝歡舞

一作職

九韶於聖主臣忝私守郡常荷載天空

馳就日之誠未盡歌雲之慶無任欣躍竦抃之至

賀冊尊號表

憲宗

韓

愈

元和十四年

臣某言伏聞宰相公卿百官及闕輔百姓耆

集作耆

老等

以陛下功崇德鉅天成地平宜加號於殊常以昭示於

來代載陳情款懇至再三陛下仰稽乾文

集作符

俯順人

志乃以新秋首序令月吉辰發揚鴻休膺受顯冊天人  
交慶日月揚光寰海之間含生之類抃歡踴躍以歌以  
舞誠歡誠喜頓首頓首臣聞體仁長人之謂元發而中  
節之謂和無所不通之謂聖妙筭無方之謂神經緯天  
地之謂文戡定禍亂之謂武先天不違之謂法天道濟  
天下之謂應道伏惟元和聖神文武法天應道皇帝陛  
下子育億兆視之如傷可謂體仁長人矣喜怒以類刑

賞不差可謂發而中節矣明照無私幽隱畢達可謂無  
所不通矣發號出令雲行雨施可謂妙筭無方矣三光  
順軌草木遂長可謂經緯天地矣除剗寇盜宇縣清夷  
可謂戡定禍亂矣風雨以時祥瑞輻湊可謂先天而天  
不違矣國內無飢寒四夷皆朝貢可謂道濟天下矣衆  
美備具名實相當赫赫巍巍超今冠古方當講明堂辟  
雍之事撰太山梁父之儀搜三代之逸禮補百王之漏  
典時乘六龍肆覲東后微臣幸生聖代觸犯刑章假息

海隅死亡無日瞻望宸極神魂飛揚有斥

集作永

棄之非

集作悲

無自新之望曾不得與鳥獸率舞蠻夷縱觀爲此啣

酸抱痛負

集作且

恥且慙無任感恩戀闕懇逼徬徨之至

謹奉表陳賀以聞

爲河南盧尹賀上尊號表

武宗

李商隱

會昌五年

臣某言臣得本道進奏院狀知宰臣某等奉上尊號以  
光洪休耀列聖之睿圖表三宮之慈

集作義

訓凡在生物

孰不歡心臣某中賀臣聞善言天者必推功於廣覆善言

日者必詠德於大明然後物仰玄穹人知景曜皇王擬  
象今古同規伏惟仁聖文武章天成功神德明道大孝  
皇帝陛下體天垂蔭法日輪輝弘上德以纘戎啟下武  
而膺運頃從臨御旋致治平雨塊風條時推順適苗蟪  
葉蟻坐致消亡是以銀甕石碑非煙浪井神而告瑞史  
不絕書且獯鬻爲災周秦乏策金行火運不絕於侵陵  
瀚海陰山幾渝於約誓而敢乘衰運來犯昌朝陛下乃  
赫以天威授之宏畧一伐而單于僅免三鼓而貴主來

還滅大邦之仇讐，據累聖之忿憤，及晉陽逐帥代馬，新  
羈陛下，又濬發宸襟，委諸廟畫，決辰而前，軍就路逾月，  
而元惡膏碓，淨豐沛之遺疆，舉陶唐之故俗，蕞爾潞子，  
復生孽童，脫縲冀，恩止柩，拒詔據九折之險，有五州之  
人數澤逋逃，糞土租稅，陛下又遠揚神斷，深詔徂征，合  
鎮魏之強藩，出韓彭之銳將，夷其巢窟，去彼根株，清明  
皇之舊宮，復金橋之故地，曾非曠歲，集此丕功，固已至  
化潛融，事光於玉板，玄機獨運，理溢於瑤編，况又志切



希微道存冲漠慕遺蹤於姑射載動堯心思順請於崆

峒欲勞軒拜遠惟

集作揚

聖祖載佇神孫俾異法皆祛多

門就掩麟殿正玄元之座鳳書招黃老之徒將以休有萬  
齡臨茲兆衆使咸踐壽昌之域俱遊富庶之鄉巍乎煥  
乎盛矣美矣故得人祇叶欲華夏均懷願加尊顯之稱  
以報財成之美宰臣等果能陳大義允建鴻名伊尹暨  
湯咸有一德咎繇謨禹克讚九功逮至善於王猷標具  
美於帝錄南山稱壽北辰降光永終一作於無極之年長

奉上清之號臣幸丁昌運方守洛京空深戀闕之誠不在稱觴之列舉頭見日雖悲千里之遙測管窺天且慶百生之幸無任徘徊望闕蹈舞踴躍之至

賀新樂表

周武帝

庾信

臣等言臣聞天地順動則雷出爲豫聖人功成則風行有節故六德在咸池之官山谷可調八風入承雲之奏人神不雜我大祖文皇帝體國經野設官分職變魏作周移風正雅衣裳而朝萬國珪璧而會諸侯至如經綸

圖籍校讐煙燼樂正無缺章秩宗無廢典豈但商頌十  
篇得諸太師之室虞書五禮取於恭王之宮伏惟皇帝  
以下武嗣興中陽繼業運日月之明動淵泉之慮律歷  
著微無煩於太史陰陽晷度躬定於天官故得參考八  
音研精六代封晉魏爲二王序殷周爲三恪雖復朱干  
玉戚尚識典刑素鼓纁裳猶因雄據未若山雲特起八  
卦成形鳳凰于飛九州觀德改金奏於八佾合天元於  
六舞聲含擊石更入登歌調起初鐘還參玉管足以感

天地而通神明康帝德而光玄象昔者齋居玄扈爲曲  
在於雲門師度盟津習舞歸于山立遂乃包括三名克  
諧一代作者之謂聖天之所啟乎豈惟路鼓靈鼓空桑  
孤竹廣矣大矣輪焉奐焉是知零陵孝廉空傳玉管始  
平太守虛稱銅尺臣等並預鈞天同觀張樂軒墀弘敞  
欄檻眺聽崇牙業業猛簾趨趨翠鳳揚旌靈鼉樹鼓杳  
冥雲霧蕩薄丘陵醴泉與甘露同飛赤鴈與斑麟俱下  
聘魯請觀理當見其盛德適齊忘味定是知其盡美昔

淵魚聽曲尚得聳鱗樞馬聞絃猶能仰秣臣等誠愧知音敢忘悅豫若使詳其音律是所邈然但能記其鏗鏘於茲爲幸不勝慶悅之誠謹詣朝堂奉表以聞

爲雍州父老賀鑿駕停幸洛邑表

高宗

李嶠

臣等某言伏奉今日日詔書鑿駕停幸洛邑臣等輕生多幸淺識逢時青襟遊聖人之國白首觀太平之化常恐消涖難效溝壑易期所以眷戀軒宇徘徊霄極日者

農秋斲缺庶政微勤天皇損上益下忘身循物便欲移  
鑿徙蹕望河洛之封畿削賦蠲徭罷咸秦之力役臣等  
仰銘玄造退揆愚心誠以天府膏腴帝畿殷實雖菑畬  
之務稍闕於千箱而衣食所資尚豐於累載况惇嫠賙  
給家室乂安何容使宸座鳴謙聖躬服劬勞之事衡門  
高枕臣等蒙過差之澤是用低徊跼蹐抒抽慙惶方且  
選議蓬茨推中襟於白屋囚言槐棘外下情於紫路不  
謂乾心俯應聖德潛融降六璽而紆紱迴三光而改照

人欲天從既通誠感稟靈含氣疇非慶躍竊惟政途非  
一朝務有恒國彝不可以思疑廢家征不可以事闕天  
皇愛精頤壽荅兆庶之歡心臣等畢力窮年供黍稷之  
餘稅庶得百度無曠九功惟叙伏望皇明乃睠輿輦少  
安則海甸蒸人撫耕鑿而知勉渭濱遺老仰雲天而識  
庇無任踴躍之至

爲何舍人賀梁王處見御書雜文表

前人

臣彥先等言臣於梁王三思處見御書雜文尺牘凡九十卷跪發珍藏肅承瑤檢天文景鑠璧合而珠連聖理雲迴鸞驚而鳳集究黃軒鳥跡之巧殫紫府結空之勢偃波垂露會寶意而成一作新半魄全曦象天形而得妙固已竒蹤絕俗美態入神掩八體而擅規模冠千齡而垂楷法重以語成四教文摠六詩聲咀徵而含宮音懲違而動疑作勸德用之於國敦風俗而厚人倫行之於家習雍和而崇孝敬惟彼良翰特蒙殊獎銘厚渥而歡



悚竭深誠而奉戴是用編之玉軸勒以銀繩盡罄染珠  
特裝瑤瑁之匣惣攻一作收陶壁用飾瑠璃之筭雕鏤千

品緹巾萬襲芸香却蠹芝體爲封珍寶之精下燭西崑  
之岫文章之氣上纏東壁之象實可謂天下之妙迹域  
中之竒觀者焉臣等幸遇休明叨近簪笏駭矚非常之  
瑞欣逢不世之寶足蹈手舞徒懷鑽仰之心夕死朝聞  
豈識名言之地無任抃躍歡忻之至謹奉表陳賀以聞

爲帝右相賀拜洛表

武后

闕

名

垂拱四年

臣某等言伏奉五月九日制書將拜圖溫洛肅事南郊御朝堂列群后恭聞大禮不勝慶躍臣某中賀微臣泛覽

金冊詳窺玉板商較於七十二代下上一作於數百千

年以羲軒稱皇所貴者河圖龍出以堯舜稱帝所尊者

洛書龜負猶未聞總集靈命弘敷聖業籠大勛於萬古

盡能事於一朝非天下之至神其孰能與此乎伏惟皇

太后陛下肅膺遺託光踐丕基皇業高於補天母德隆

於配地東西泱洽窮八制而流河海南北貞明洞六幽

而懸日月淹中訪禮汶上披圖情每留於布政義不忘  
於宗祀於是全謀聖造異制神行迎四象而疏園向八  
風而闢牖上圓法天而煙雲爲之動色下方象地而龜  
玉所以呈姿玄功馭範洋溢於歌頌秘采靈文昭彰於  
篆刻豈白雲青玉唯傳地理之經黃魚黑鳥但播一作  
天乙之號可以答上玄之命可以光累聖之隆制有司  
陳法駕用禋柴之典採沉璧之儀然後負黼宸而朝百  
神垂衣裳而會萬國不亦休哉不亦盛哉臣忝預出征

恨深流滯河西弔影啣珠之託未申洛北馳心拊石之  
歡何極不任悚懼之至

賀納諫表

代宗

常表

臣某言伏以補闕姚南仲和仕幹等上封事恩命特與  
改官及進階兼賜章服又內常侍吳承倩奉聖旨令兩  
省供奉官數論得失無有隱諱者德音霈然公謹知勤  
羣情震喜中朝動色易曰感人心而天下和平今之所  
感可謂深矣臣謬當丞弼之任不能有所啟聞踧躅自

慙惶汗失次然以聖德之弘納天聽之宏博欣奉踴躍  
不勝大慶中賀臣聞從諫則聖帝之德也有犯無隱臣之  
分也故上聞逆耳之忤受而不疑下有殺身之益死而  
無悔禮曰天子齋戒受諫又曰近而不諫則尸利帝道  
莫盛於有虞書之美舜則曰嘉言罔攸伏萬邦咸寧王  
道莫過於有周詩之頌文則曰思皇多士惟周之禎漢  
家維之以霸亦詳延極諫訪求得失國朝稽合皇道肇  
脩人紀貞觀故事布政典章危言正論聞於天下陛下

以欽明御歷紹休祖業仁聖廣大天覆地容求賢進善  
有如不及每覽群臣奏議日旰忘勞穆然嘉納不令夙  
退順顏者必遠忤旨者必容而芻蕘之可擇庶藜藿之  
兼採少有所補從之如流雖委輅論都即日西行伏車  
頓首路迴乘輿方之於今未云其速而又渙發宸旨宣  
導近臣直言者賞之於朝罷奏者責其所職以明沮勸  
大悅人心則太平雍熙之化溥將四表矣可以動天地  
可以服一作伏戎夷雖上古至理納諫達聰坦然不諱未

觀今日之盛也望請宣付史官光垂帝錄臣職任潤色  
敢揚鴻休無任欣躍之至

爲秋官員外郎李敬仁賀聖躬新牙更生表

武后

李嶠

臣敬仁言昨因奉事蒙恩入對伏見陛下所御湛露殿  
三間兩間雨漏無所修葺又因顧問之次伏承聖旨云  
去年口中生一齒今年又生一齒臣伏以聖德謙冲躬  
自菲薄富有四海尊居萬乘而中堂外扉不闕一作於

寒暑上棟下宇未離於燥濕降紫宸而齊白屋屈帝力  
而用氓心雖昔之采椽土階茅茨蒿柱漢皇之儉用夏  
后之卑宮六籍之所讚揚百家之所記述曷足以希風  
上聖仰帝道之崇高擁彗後塵望皇輿之軌躅臣又聞  
之易有四營金牙爲壽考之象詩有六義玉齒載神仙  
之謠還年而編貝不虧却老而瓠犀仍出亦有堅而不  
脫聞於導養之方落而更生得自靈飛之散斯並道藏  
幽記術隱上情誠福力之所招匪勤求而可致陛下端



莊靜默寬惠仁慈抑嗜欲而省煩勞恤飢寒而甘敝陋  
宜其延貺宗社受報黎元集天地之休和享靈祇之介  
祉故得百祥護體五福登年同鎬邑之夢齡邁鑪宮之  
錫壽豈徒一人有慶常居北極之尊實乃萬姓同歡共  
仰南山之固臣謬以庸賤獲奉宸嚴欣聖壽之延長願  
稱大慶見宸居之挹損思揚至德乞宣示海內仍錄付  
史官庶使六合之中知寶筭之方永百代之後頌休風  
而不絕無任抃躍之至謹詣闕奉表陳賀以聞

賀聖躬痊復表

代宗

常袞

臣某言臣親

一作見

奉聖旨伏承御膳過時微似煩熱臣

等退用兢悸不安寢興齋居潔誠思獲休問適中使吳

承倩至奉宣德音今已校退卿等不須憂者恭承睿旨

俯協歡心欣抃失容蹈舞不足伏以陛下裁成二氣聽

斷萬方每積憂勞載勤早曠

一作宵旰

所以下祈人命上黷

聖躬責在微臣退增兢懼今溽暑過候涼秋戒期方助

穆清上滌玄慮伏惟簡臨庶政保合太和以答天地穰

穰之福以慰臣子顛顛之望天下幸甚無任喜慶踴躍之至

同前

于公異

臣某言今月十七日衙官吏萬項奏事回伏奉手詔伏審聖躬頃暫垂理今悉康平凡在臣子不勝抃躍中賀伏

惟皇帝陛下自天生德紹聖垂衣

類表作休

運啟握符已慶

無疆之壽疾稱勿藥果從有喜之辭歡初洽於朝廷慶旋周於海內臣伏以天心恭順庶政殷繁既當痊愈之

初宜加頤攝之道然猶日盱對奏未明求衣理或至於  
憂勤事終干於思慮恐乖將候竊未遑寧伏乞朝廷之  
宜付之宰相伐討之任仗彼戎臣從容聖心消息玄化  
爲宗社自愛委諸有司幸甚幸甚臣蒙國寵榮輒露誠  
懇伏惟察納表臣愚衷

同前

臣某言今月七日中使至進伏奉敕書手詔慰諭臣者  
伏以聖躬頃垂頤攝少有不安景福無疆旋以康泰屏

營奉詔且喜且驚臣聞子之事親出告反面臣之事主  
移孝爲忠君親之間其體無異自宜問安內豈增憂寢  
門平居之時猶無闕禮乖理之後豈合遑寧又臣聞勤  
則近憂憂則生疾豈陛下以萬方黎庶尚未和平三輔  
甲兵猶從征討此皆臣下之過遂煩君上之懷臣特荷  
國恩超踰儕輩死不係於己命休戚實同於國家况  
聖壽日躋皇符永固雖禎祥合慶祚必壽於南山臣子  
馳誠心豈離於北闕

類表  
作極

伏以聖謀思振邊徼正安輕

騎無信宿之程郵館無兼金之費臣欲旬日之內輕行  
入朝陪列庶官恭承睿旨審聖質之安否布微臣之款  
誠伏乞矜允遂臣愚懇

賀聖體平復御紫宸殿受朝賀表 元 稹

臣某言今日得上都進奏官報稱昨日陛下御紫宸殿  
受群臣賀表伏審聖躬萬福親見百寮率土皆歡溥天  
同慶臣某中賀臣聞兩曜有明晦所以成其不已四瀆有  
盈縮所以成其不竭不有燎火無以辨玉質不有霜霰

無以驗松心是以軒轅神仙然後夢華胥之遊秦穆疾  
寢然後享鈞天之樂堯以癩瘠而爲聖禹以胼胝而稱  
功斯皆因疾成妍以勞逢福非臣臆度敢進瞽言昨者  
聖體不安纔經旬日穆不卜吉勿藥有喜此所以表北  
極而長尊配南山而永固者也况日臨黃道萬物皆榮  
帝御紫宸千官畢賀臣恨以守符外郡不獲稱慶明庭  
空懷鼓舞之心莫備賡歌之末臣某無任跳躍徘徊瞻  
望歡欣之至謹差知衙官劉宗奉表陳賀以聞

代安平公華州賀聖躬痊復表

文宗

李商隱

臣某言今月某日得奉道進奏院報以聖躬痊和右僕射平章事臣涯等奉見聖躬訖社稷殊祥生靈大慶臣忝分朝寄四奉國恩無任抃舞踴躍之至臣聞天普覆也應運而健若龍行日至明焉有時而氣如虹貫伏惟皇帝陛下道超普覆跡邁至明思社稷集作宗社之靈惟德是輔念蒸黎至廣以位爲憂求衣未明觀書乙夜壽域



既勤於躋俗大庭微闕於怡神是以自北陸送寒斃停  
禹會及東郊迎氣爰復堯咨四海方來百辟咸在六幽  
雷動萬壽山呼惟臣獨以一麾載離雙闕犬馬之微誠  
空切鴛鴻之舊列難階提郡印而通霄九驚對使符而  
一食三起今幸以俗臻富庶年比順成伏惟稍簡萬幾  
以迎百福託變調於彼相責綏撫於列藩承九廟之降  
祥副兆人之允望臣某不勝悽悽慙慙之至謹差某奉  
表陳賀以聞

文苑英華卷五百六十九

欽定四庫全書

文苑英華卷五百七十

宋 李昉等 編

雜賀二

爲宰相賀趙郡鑄天尊及佛有諸瑞表一首

爲宰相賀開元寺鑄釋迦牟尼佛有白光等瑞表

一首

爲宰相賀宮人夢玄元皇帝應見表一首

賀新殿鍾鳴表一首  
賀感夢聖祖表一首

百官賀佛放光表一首

百官賀朔旦冬至表一首

爲汝南公賀元旦御正殿受賀表一首

賀大衍曆表一首  
賀示曆書表一首

代百僚賀放浙西租賦表一首

爲杜相公賀恩賜淮西粟帛表一首

中書門下賀抑情復膳表一首

代李侍郎賀德政表一首

爲宰相賀趙郡鑄天尊及佛有諸瑞表 玄宗

孫 述

臣等伏見趙郡奏鑄等身元始天尊其日天氣晴和祥  
雲散彩又開模未畢先出白光尊容漸見毫光圓滿其  
花冠耀白色如玉遍身衣帔自然雲霞眉上有兩點白  
光流轉照耀又鑄等身釋迦牟尼佛螺髻兼遍身自然  
玉色唯頂至面爲紫金色聖情敦道天心護法爰降宸  
儀將崇寶相鑄寫之際禎祥屢臻初法止 一作於上京

遂呈祥於外郡金姿玉色不假琢磨霞帔霓裳非因藻  
繪見祥光於眉宇生瑞氣於雲端曲示明徵宛如合契  
玄貺稠疊周彰萬億之期蒼生何幸盡登仁壽之域臣  
等忝奉一作侍軒墀倍深欣慶無任抃躍之至謹奉表陳  
賀以聞仍望宣示朝廷編諸簡冊

爲宰相賀開元寺鑄釋迦牟尼佛白光等瑞表

玄宗

臣等伏見開元寺所鑄釋迦牟尼佛身現金色頂含白

光發濃紫於聖容散純黃於佛體未加瑩飾已成相好  
殊祥異應昔所未聞伏以聖人爲心玄妙莫測至誠所  
感靈變無方陛下子育群生弘脩正教寫真容於法界  
傳寶相於恒沙洎崇建以來禎祥一作符畢集自有神通  
之助豈資人妙之功超絕瑞於千古表昌期於萬邦凡  
曰士庶不勝慶幸況於臣等倍切常情無任抃悅之至  
謹奉表陳賀以聞

爲宰相賀宮人夢玄元皇帝應見表

玄宗

前人

臣等昨因奏事親承德音宮中有一婦人性頗好道然未通悟數日以前忽夢玄元皇帝慇懃教誡道法尚未盡解遵承無何又依前夢見大被呵責遂以水喫其兩目因而喪明比覺後都無所見然始責躬罪已情祈至真又夢玄元皇帝教之曰汝可見吾孫自立愈其婦人曰不知吾孫是何人曰汝皇帝是也汝至酉時可見當施其法使汝知驗至特宮中教人共扶見朕朕爲潔誠



作道法使救療其目須臾自開平復如舊聖祖靈感胎  
然合符與卿等同慶者伏以混成莫測玄元闡其教衆  
妙難名陛下光其業二聖表德千古叶符將告天休遂  
憑宮女乘恍惚而爲夢在希微而有聲不因其言孰報  
貽孫之慶不開其目何彰救物之慈法事既陳靈徵果  
驗能使病者復歸其明當聖躬本命之時合烈祖玄通  
之契事且符於久視理仍叶於常存殊尤之祥載籍未  
有臣忝跡樞近親奉德音慶悅之情實倍恒品無任抃

躍之至謹奉表陳賀以聞

賀新殿鍾鳴表

玄宗

李邕

臣邕等言伏見昨宣示於新殿爲萬姓祈禱神鍾自鳴是知聖作昇聞天意下降道開皇極潤及生人臣等中賀臣聞光覆動植者莫如天臨照幽遐者莫如日自非齊聖妙用曷以則而象之玄化至德曷以感而通之伏惟陛下道心冲叶神教昭宣以四海爲家萬人爲子常恐水旱遞有干戈斃勞所以供祀百神用祈五福德澤被

物聖靈動天睿情注於一時景鍾鳴於別殿夫衆者萬  
有也廣者四維也今陛下惣萬有一四維潛運方寸之  
間充塞宇宙之外則何聖不鑒何神不昭豈唯一鍾乎  
况南面之位屈陛下之至尊西方之金啟陛下之本命  
非無情之應是有由而來自然羣龍扶持九天欣戴保  
億兆之元后登千萬之永年時觀雍熙代偕一作仁壽  
此天所以告鍾所以鳴臣等幸朝上京欣遭大慶一舞  
一蹈未極臣子之心再詠再歌徒知天地之德無任抃

躍之至

賀感夢聖祖表

玄宗

臣邕言伏奉今日日制書至德感神通夢聖祖

一作聖祖通夢

告以莫大之福示以無疆之期上賀國觀下敷人願以  
抃以躍且舞且歌臣某中賀臣聞百川所歸者謂之大海  
萬有所仰者謂之聖人今四海獲安聖人致壽臣子之  
願允塞乾坤之應克諧粵自書籍以來感慶之深福祐  
之盛未有如斯者也伏惟陛下道用御天德心子物事

無事以集休明至明以玄悟人天乃接福眎爰臻故得  
真仙見靈異相昭應言皆合天心證非外將恢弘聖慮  
照自宸衷啟之大年授以元祐麻姑觀海歷歲彌長王  
母記桃與時無準則幽明所載宗廟所鍾兆庶子孫百  
靈齊集知億年之永託沐萬代之延休草樹自榮魚鼈  
咸若五風異色四氣同和鼓天地之大鑪鑄邦家之鴻  
業八極猶小不足受其禎符萬物每輕不足答其成造  
郵獄宥死符以再生寵賢達人宴以旬日耆艾衢陌工

賈旗亭高興太平之時歡言上古之化撫家族以自慰  
詣州邑以相誇官不驕人人不畏吏識天之覆熙焉如  
春惟聖之慈陶然如醉無任抃躍慶喜之極謹附表陳  
賀以聞臣邕誠歡誠喜頓首頓首

百官賀佛放光表

常 袞

臣等言今日董秀奉宣文成殿御功德佛放光明六宮  
及諸王公主并近侍等並觀其光從三更四點直至四  
更猶在臣聞明主之理本以庇人大聖之教先於及物

合皆符契感而遂通伏惟陛下以道法天以心  
證佛措六合於無事納羣生於慶聞薰然慈心  
在宥天下滌慮恭默齊於穆清以四海之尊勤  
三乘之法故得大雅應見變化無方毫光破昏  
金殿如晝照恒星而奪彩混圓魄而一色曠代  
之瑞天人咸覩玉漏將盡銀河以低仰光明而  
無際知皇劫之彌遠臣等謬忝樞近倍萬恒情  
無任慶抃之至

百官賀朔旦冬至表

許敬宗

貞觀十四年

臣聞乾坤資始上元開歷象之端日月還流朔旦正璿  
衡之本事韞有形之表理遂無物之先故能運彼玄樞  
財成庶類麗茲黃道孕育羣生惟聖則天允執在躬之  
歷惟皇作極必叶履端之契所以書稱敬授易曰明時  
克正降平無非此道伏惟皇帝陛下聲凝祕籙功弘造  
化縱如神之玄覽體不言於四海發就日之光華同無  
私於七曜階蓂循晷阿鳳吟辰元精究開闢之初握先



窮名數之始裁炎涼於玉管節雨露於金渾道格彼蒼  
仁霑無外八紘受朔盡入封疆九譯承風遠遵文軌昆  
蟲涵於凱澤草木汎於榮光由是上感天而下漏泉不  
愛道而効其寶肇一元於甲子致希世之貞符挾五始  
於長至播光前之茂禮伏見宣義郎李淳風表稱竊見  
古歷分日起於子半勘得今歲十一月甲子朔旦冬至  
而故太史令傅仁均欲苟異張曹玄法減餘稍多子初  
爲朔遂差三刻用乖天正然自初及半日月全未相離

筭與太初事皆符合奉敕付有司及經術者詳加考定以議奏聞於是鴻生碩儒咸稽茂典研精覃思俱考舊文國子祭酒臣孔穎達十有一人與尚書八座叅議得失咸以爲仁均定朔事有微差淳風推校理尤精密謹按漢書云古者黃帝合而不死應邵云歷合天心而得僊也又按益部耆舊傳云洛下閎改顛頊法更作太初歷自云後八百歲此歷差一日有聖人出定之斯乃差日濫觴久著之於冥兆聖出之驗叶當今之有徵俯會

八百之期遠叶九仙之道臣等緬維邃古歷考前王若  
乃萌氣黃鐘兆根玄牝闡其幽而藏其用窺其奧而開  
其文列聖存而不論故無得而稱也自圖書爰始三統  
騰鑣皇王以來六家分軫帝軒垂憲大挽汨其洪源伯  
禹嗣興小正窮其至蹟命羲叔於唐歷考箕子於周年  
或以玄乙司分翠虬定箭登清臺而索隱揆圭表以知  
微事緒多途無聞感應猶且各稱書契並擅鴻名改年  
號以應元符禮日觀而爲稱首豈與夫兩儀同德五緯

齊明景延南正星纏北流聯珠候朔的皦清漢之間合  
璧規天徘徊紫霄之上校先代之優劣豈同年而語哉  
庶當玉輅徐輪金泥祕檢塗山之下會百神而合符介  
丘之側朝萬玉而光輝天人交際不亦休歟臣等生屬  
壽昌累逢祉福至於今慶曠古無儔何幸如之親承旦  
暮不任欣躍之至

爲汝南公賀元日御正殿受朝賀表

臣某言臣得州本進奏院狀稱報元日皇帝陛下御含

元殿受朝賀者上正三辰下臨萬國事雖舉舊命則惟  
新中賀臣聞聖祖垂訓王者處域中之尊公羊紀時春者  
爲一歲之始載稽故實抑有典章近歲以來此禮多闕  
或事因惜費或時屬告休伏惟皇帝陛下道被無垠政  
敷有截全取發生之德無非訢合之仁蒼旻降符黃輿  
告瑞石碑既見文作太平銀甕旋臻字成萬歲而又憂  
勤不輟克責方深精誠旁照於八紘懇惻上通於九廟  
仙廚撤味獸館休畋遂使化妖宿爲壽星變小戎爲餓

殍慶由聖感令屬神行爰在新正式脩闕典彤庭列位  
丹陛陳儀凝旒而天啟其門服袞而日升於觀巽風發  
越允澤滂沱左右賢臣駿奔多士國無諛佞擢靈草而  
不指朝絕奸邪儼神羊而莫動禮成而退物有其容

一作

官况

一作只

以光耀瑤圖丹青玉版輝前映後邁五登三

臣竊訪碩儒遠徵舊典帝堯華封之祝唯止匹夫神禹  
塗山之儀且非元會然猶堯有多憂之戒禹存

一作行後

至之誅在和平而尚乖孰歡呼之可致豈與茲日而得

同年臣方守河潼正分符竹不獲躬陳玉帛首率梯航  
况又嘗以藝文叨居禁密雖遠離天上猶近闕西抃賀  
空深就望無所心馳紫闕非夢寐而不通魂統皇闈羨  
歸飛而莫及無任賀恩祝壽戀闕屏營之至

賀大行歷表

玄宗

張說

臣說言伏以開元大行歷天旨裁其紀綱日官考其精  
密履端更始敬授惟新加以辨五行之序推七政之數  
明散聖期實光土德臣又見梁天監中陶弘景著玉匱

記云盛德木子以肇來運項者僧一行推璿衡歷得皇家天命成數千年古今祥兆若合符契歷數既在於聖躬卜年仍表於長曆莫大之慶獨冠前王臣忝跡儒林預聞昌運無任抃躍之至謹奉表陳賀以聞

賀示歷書表

玄宗

臣某等言內侍尹鳳翔至奉宣聖旨內出新撰歷書二十五卷以示臣等竊窺深奧仰觀英華涉海登山罔知攸際臣聞唐堯光宅順昊天而定四時虞舜登庸在璿



衡而齊七政伏惟開元聖文神皇帝陛下至德廣運文  
明睿哲道冠生知與神合契備往聖之能事紹昔王之  
闕典發揮易象以應乘乾之時考正歷書更表履端之  
始上包二帝下括三王徵晷運之盈虛究推步之踈密  
備稽氣象載纏坎離一作戴履纏離三辰順軌而更明五緯合  
度而增煥是使天地貞觀神人允諧唐虞舊章於斯重  
覩臣等幸陪書府得預朝門抃躍之情實萬恒品奉表  
陳賀以聞

代百寮賀放浙西租賦表

呂溫

臣聞等言伏見今月十五日制命以天下經賦首於東南浙右諸州荐罹災歎全以逋債大赦湛恩人謠勃興朝聽震動中賀臣聞三王以降綿曠千祀爲邦之政盡在欲理之主甚衆莫不知傳戒獨豐語稱與足至於愛人節用之際約躬紓國之時則必情隨事遷以欲忘道故曰人鮮克舉行之惟難伏惟皇帝陛下濬發睿圖紹休聖緒躬行慈儉子育困窮皇明燭幽惠訓不倦撫臨萬

國曾未再周深求疾苦之源屢下蠲除之詔裁戎祀之  
經費減乘輿之服御雖邦計之有羨入憂於未憂雖生  
人之所樂輸損之又損風行號令日貫精誠明神聽其  
德音和氣生於文字將舟車所及咸升至理之期豈江  
湖下方獨被曲成之澤臣等尸素有日獻納無聞尚勞  
聖心軫恤人隱甘同凡品不敢望於清光竊與疲疇共  
謝生於玄造無任感抃之至

為杜相公賀恩賜淮西粟帛表

符載

臣某言今月某日使某官至伏知聖旨賜淮西節度使  
吳少誠米若干石鹽若干石絹若干疋雨露之潤忽沾  
於焦旱生育之德忽被於飢寒凡在臣庶孰不慶幸臣  
某誠歡誠喜頓首頓首日者少誠迷誤興兵淮蔡陛下  
開日月之耀霽雷震之威洗其瑕穢復賜珪爵使螻蟻  
重安於窟穴草木再決於恩光大一作忠義易亮邪之心  
和平銷悖亂之氣今復恤其歎儉賜之粟帛聖澤灑危  
疑之地皇慈周反側之人合救時之宜塞未萌之釁微

禽食椹尚懷好音萬夫載恩豈不知感此所謂睿圖宏  
遠神武深沉善戰於仁施之中伐謀於茫昧之際武何  
戈而不止物何化而不從增七德之輝華動八紘之踴  
躍臣叨居將相職守藩維不獲奔走稱慶宮闕無任歡  
抃懇款之至謹奉表陳賀以聞

中書門下賀抑情復膳表  
常 袞

臣某等言中使吳承倩至奉宣進止以臣等所奏華陽  
公主初薨聖慈深悼抑情復膳保御至和伏惟

類表作承 陛

下初以愛主幼冲純性聰敏

類表作達

思念之厚有過於成

人疾病之憂非止於一日早齡遽失沉痛兼哀臣等不

安下情惶燭上請微誠感達蒙降德音而不以至憂

類作

愛之私忘於所寶之重推必然於大分割無益以遣懷

用復常禮以勤庶政致此陛下齊親踈於一致和福壽

類表作弘覆轉

於萬邦契睿

類作聖

祖玄元之符實天下蒼生之

福臣等累日兢怖焦心失圖承命釋憂倍百慰幸無任

感悅之至謹奉表陳賀以聞

代李侍郎賀德政表

德宗

呂溫

臣某言臣聞上蒼垂象當分野者先知元后用心奉職  
司者方見是以堯稱光被四岳得於疇咨舜號文明九  
官稟其集作分命豈非隨方表志因事立言陳力自參

於化源造膝難迷於日用伏惟皇帝陛下睿圖濬發玄  
德廣運恢纂鴻緒允升大猷振十聖之遺休復百王之  
墜典至如崇陵盡瘁率禮無違長信歸尊因心則感內  
成則仁叙九族外平則義協萬邦厚俗則寵及高年廣

孝則榮加錫類能刑則朝無隱惡善任則野不遺才修

文則戎蠻來威

集作王

整武則南北繼捷此皆事懸

集作光

日月聲洽寰區黔首之所謳歌縉紳之所抃蹈

集作歡

其

或機參造物意兆先天事隔於人謠功隱於朝聽者若非奉職之臣官業所及諒無得而稱焉臣以庸劣謬膺

寄任調盈虛而馭輕重關成敗而繫安危職思其憂夕

惕若厲每因罄率披竭愚衷

集作忠

出奉溫顏累承睿旨

有以知造化之意有以見天地之心曠若發蒙折

一作浙



如愈疾管窺所至可得而言昨者臣以潮州刺史李璿  
放縱私鹽耗散公利請從免職以儆慢官陛下以爲法  
令改更且一作宜當申諭道塗悠遠容或未知俾爲後圖

用緩前責弘恕包於廣大明察貫於精微此則羣臣不  
可望清光者一也江南西道觀察使楊憑奏以支郡旱  
歉經賦不充請征居地之美且循稅茶之法陛下以天  
災流行以時而息人怨滯結貽患則深縱無日新之美  
忍復已除之弊特令寢奏姑務通商有司知畫一之方

負販有昭蘇之望此又群臣不可望清光者二也臣嘗

使推官殿中侍御史崔太素奉使淮南臣以太素

二字集作

其名秩甚卑濬決務重徵令郡縣釐

集作整

訓役徒須示

等威請賜章服陛下以爲職任伊始勤効未成必有可

觀乃申後命臣再陳所切方可其奏雖事從權與且濟

物之宜而賞不僭行已見永圖之旨此又群臣不可望

清光者三也臣對敎之日親奉德音知臣使司支計闕

少必擬昭明儉德振起素風謹身率天下之先節用自中

宮而始又曰

集作云

臺殿舊制已當惕慮經營改作非所

措懷將不崇三尺之階豈復議十家之產發自宸念形於天顏意開而河海自清言出而神祇知感此又群臣不可望清光者四也陛下光臨大寶星歲將周貴戚之賜與無聞恩倖之霑霈殆絕至於贍軍供國行賞報功則必鴻毛府庫糞土金玉遂使夏州諸將恨効淺而恩深劍外三軍知生輕而義重此又群臣不可望清光者五也夫唐虞盛烈文武餘風莫不傳諸聲詩布在方冊

且匹夫匹婦片善必書飛羽沉鱗一祥皆紀况陛下動  
關教化言在政刑理叅至道之精躬行盛德之事而冲  
虛謙讓蔚而未發將何以光揚藝祖昭示後昆伏請宣  
付史官永爲大法臣幸蒙恩遇獲奉昌期言必親聞事  
皆目覩分深骨髓義激血誠輕黷宸嚴魂宇集作首飛越  
無任屏營之至

文苑英華卷五百七十

欽定四庫全書

文苑英華卷五百七十一 宋 李昉等 編

遷祔慰賀

代人賀遷獻懿二祖表二首

為代宗告謝九廟表一首

代百寮慰七廟追崇先祖表一首

為于侍中請赴山陵表一首

為崔冀公請赴山陵表一首

為裴尚書慰山陵事畢上表一首

代中書門下賀八陵脩畢表一首

賀脩八陵畢表一首

慰過山陵表一首

為福建閩常侍奉慰德宗山陵表一首

為羣官固請公除表三首

將加神龍尊號羣官請公除表一首

為羣官請虞卒哭表一首

為李僕射慰義章公主薨表一首

為杜司徒慰義陽公主薨表一首

為王侍御瑾謝宣弔兼賻贈表一首

為令狐博士緒補闕絢謝宣祭表一首

賀順宗謚議表一首

代齊賈二相賀遷獻懿二祖表 呂 温

臣某言伏見今月十四日制命以尊尊親親之義虔祔  
獻祖懿祖於德明興聖廟室正太祖景皇帝東向之尊

者十五日奉遷事畢十六日祫饗禮成日月貞曜乾坤

定紀稱情靡忒合敬有歸百神得受職之方萬國知來

祭之本中賀臣聞國有事莫大於嚴祀禮有經莫大集

崇於尊祖夏殷得之以繁祉周漢用之以集休明爰

自魏晉迄于隋氏或以祚短而不及祧正或以時艱集

難而未遑討論紛綸興謝綿曠載祀竟虛盛典類表允

屬昌期陛下道冠前王慶殷累聖奉無競之烈克廣鴻

休瞻有赫之靈思正大典精誠感念肝食疇咨內斷皇



明俯裁羣議奉祖宗於常尊之地定昭穆於式序之宜

清廟肅雍立

英華避諱改作  
吳今從集本

穹保佑奔走夷裔鼓舞生

靈煥乎觀一代之光盛矣接千年之統臣等自鍾舛薄

坐嬰哀瘵不獲躬執籩豆稱慶闕庭誠仰聖敬

英華避諱改作

教今從集本

感深孝理形留神往倍百恒情無任竊忻之至

代京兆李尹賀遷獻懿二祖表

劉禹錫

臣某言伏見詔書以今月某日奉遷獻祖懿祖神主祔

於德明興聖皇帝廟盛禮云畢宗祧永安誠感誠悅頓  
首頓首伏以太祖景皇帝膺期撫運啓封于唐為百代  
不遷之宗開三靈眷命之兆頃以本類表朝初建清廟

備儀二祖冠西室之先景皇闕東向之位諸儒獻議歷

載未行陛下濬發睿筭旁延正論爰詔多士會于中臺

酌三禮之前文參百王之故事講貫斯定詢謀僉同備

物類表集本展儀至立視履配貴神於遠祖正尊位於

作撰日

始封廟貌有嚴補之太穆示人以孝得禮之中既觀秩

秩之容必降穰穰之福同職為內史屬忝本枝躬遵盛儀獲申誠敬無任感悅屏營之至

為代宗告謝九廟表

常 袞

臣某言臣纂承丕圖懼忝鴻業宵衣旰食寅畏增深未戢難於寰區恐獲戾於宗廟明發惕厲祈哀聖靈夢寐承顏如親左右謂臣曰知爾孝敬憫臣而降以恩私福及冲人祐其後嗣德音所誨歎息如聞睿旨慈仁再三眷命追攀不逮哀慕難任欲報之恩昊天罔極無任荷

恩摧咽之至謹奉表陳謝以聞臣某誠悲誠喜頓首謹  
言

代百寮慰七廟追崇先祖表 李 嶠

臣某等言臣聞享帝立廟陳乎太極之典尊祖配天載  
乎厥初之頌蓋用嚴宗虔祀敦孝睦親以脩海內之職  
以崇天下之訓斯千帝百王之所因襲也四學三雍之  
所講論一作肆也伏惟大周繼天作聖踵武嗣徽湛恩洎  
於行葦崇構興於綿昃陛下纂祖宗之洪緒資聖神之

睿問乾坤合德日月在躬利澤浹幽顯光明燭宇宙用  
能誕膺休歷丕臨大寶近惟神祇福祿之祚遠想稼穡  
艱難之業后稷以弼諧大舜隆姬錫受命之符太皇以  
翼亮有唐聖武當樂推之運七百之鴻基不墜九五之  
尊位以光天休荐委靈命再集豈非積善累慶深仁厚  
德之致歟夫源長者流深道悠者利博是以商廟觀德  
享祀彌乎七代牧野追尊行號光於三葉今者徽章改  
物鍾石變音神靈扶更始之運億兆慶維新之業宜其

憲章典禮損益質文奉嚴祀之恆事採褒崇之故實三  
昭三穆對於不遷之祖八簋八簋存乎如在之敬然後  
上以化下卑不臨尊弘詩人永錫之義合周易大觀之  
象豈惟祖考來格實懷安樂之心故亦夷夏式瞻載佇  
雍熙之福伏願浚發皇鑒時流天璽考經籍哲王之典  
雜縉紳先生之議涓時擇日冊祝備禮臣等得參陪振  
鷺洗滌大牲承奔走之下列觀肅邕之盛典則一人有  
慶子孫承永保之祥四海宅心臣下得自安之地無任

懇懇之至

為于侍中

後篇作即

請赴山陵表

上官儀

臣某言伏以塗宮方撤祖載有期

後篇作辰

踏厚地而靡容

跼高穹而標絕臣昔逢開運委質藩朝荏苒迄茲

後篇作今

年將一

一作數

紀位非德漸榮

以後篇作自

恩滋顧視

後篇作循涯

分何階致此而今谷林啓隧宸衛將移衽席遺簪纏哀

罔極方願整素

類表作網絲後篇作隨縷

翻而攀慕奉劍舄

類表作弓劍

而崩號

後篇作推

送往已

後篇作茲

窮事居方永特希宸鑒曲遂

荒襟伏紙失圖罔知攸措

此篇六百七卷重出今已削去

為崔冀公請赴山陵表

于公異

臣某言臣聞臣之事君盡於追遠子之事父禮在送終

忠至苟全死且無悔

後篇作恨

臣某中謝臣本山東布衣耕

于

後篇作於

淇澳弓裘陵替無以庇身屬天寶中玄宗聖明

河海

類表後篇作海寓

清晏臣始忝宿衛入侍丹墀合門歡榮

長幼同慶洎祿山叛命慶緒西侵玄宗以玉輅南巡肅



宗以金與北幸諸侯避狄天子蒙塵臣當此時有死無  
貳於是執戈荷戟漸拜偏裨逮肅宗克復兩京再安九  
廟臣遂東征西伐式遏蕃蠻荷寵承榮稍遷將帥先皇

以臣頗經統領久鎮方隅天渙曲臨授臣節制

後篇作  
遐方授

節

一辭雲陛十載守邊空懸魏闕之心未展子牟之戀

徒慙保障有愧繭絲

後一篇  
作璽書

肇自一官累登三事兢惶

罔措悲駭失圖荷戴恩榮不勝號絕且諸侯五月同盟  
至天子七月同軌至今先皇厭代已歷四旬臣妾攀號

哀纏六合况臣一身授任九族霑榮華穀朱輪留蟬滿

路永惟恩寵答荷

後篇作効

何階豈謂先皇

後篇作帝

升遐臣不

得執紼陵隧陛下登極臣不得

後篇作違

稱慶闕庭吉凶二

途禮制皆闕伏乞皇

類表作聖

慈曲被天澤俯臨許臣匍匐

玄堂稽首黃壤攀穹永訣跼地長號獲申罔極之哀用

畢終天之願無任殞絕崩迷

後篇作迫

之至

此篇六百八卷重出今已削去

為裴尚書慰山陵事畢上表

崔融

臣某等言自過密纏悲山陵啓卜陛下情深撤帳戀切  
遊冠至於鹵簿吉凶途程日月莫不親垂睿旨顯發宸  
衷由是川后競馳山祇荐委雲物澄霽景氣清和靈駉  
電轉非因下人之力神輦風行自有上天之助山河道  
路曾不艱虞木石犬馬咸當感悅豈非大孝所洽通於  
神明至聖所弘動於天地者矣伏以某日吉辰永安神  
寢郊原四合門闕九重傍奉園林近瞻京邑立宮一闕  
紫禁長辭萬國同軌五情分裂伏惟皇太后陛下哀慕

永往聖懷難居臣等早侍軒墀謬霑簪履攀龍不及顧  
慕軒轅之臺耘鳥相驚屏營會稽之野限以歸從未由  
詣闕無任悲感之至謹遣某奉表以聞

代中書門下賀八陵修復畢表

德宗

權德輿

臣某等言臣聞宗廟之享以致吉蠲山園之制以極嚴

敬國朝祀典盡

集作參

用漢法寢宮便殿永

集作度

奉衣冠

日往月來久未脩復伏惟皇帝陛下繼明恭己大孝因

心丕承祖宗對越天地薦馨香於九廟崇經構於八陵  
庶民子來百堵皆作人神協吉龜筮告猶用成弈弈之  
新實自蒸蒸之孝行宮盡復神御以安掌禮之官虔於  
受命奉陵之縣但覩成功慮財用而靡

集作不

賦於人量

事期而不愆于素罔極之感交於神明奚斯閔宮徒頌  
諸侯之事叔孫原廟蓋匪先王之法孝彰禮備豈比於  
今列聖在天萬方受祉春秋匪懈超冠百王臣等謬忝

集作

台司獲承詔旨無任誠賀之至

貞元十四年八月十七日

賀修八陵畢表

令狐楚

臣某言得進奏院狀報八月十五日百寮於宣政

類表作和

殿賀脩八陵畢伏惟陛下行通神明孝彰天地深懷遠

慕嚴奉諸陵台階元臣展敬以祇命旬服蒸庶忘勞而

陳力芟

類表作薙

青蕪以疏微道掃紅腐而淨藩園崇固護

於岡陵增肅清于松栢漢朝充奉徒見其遷人魏時向

望空聞夫作樂方今大禮彼實缺然天下臣妾不勝幸

甚况臣名編竹籍屬忝葭莩感慶之誠倍百恒品

奉慰過山陵表

伏承順宗至德大聖大安孝皇帝奄過山陵率土臣庶

不勝號慕伏惟陛下孝思天

類表作之

至祇事薦誠精貫昊

穹禮備園寢攀慟

類表作號

罔極聖情難居臣諤列藩條限

於守職不獲奔走陪慰內庭無任感惕兢越之至

為福建閩常侍奉慰德宗山陵表

前人

臣某言伏見制書大行皇帝靈駕尅以某月日遷座崇

陵先太后梓宮自靖陵啓發同時合祔萬邦永慕悲纏  
於弓劍七月有期痛延於蠻貊伏惟皇帝陛下孝思罔  
極至性自天攀奉山園聖情難處中慰先朝臨御悠長威  
靈遐被儲祉傳聖以福四方今祇祔禮終清廟如在率  
土臣庶實謂一作哀榮臣職忝方隅分憂地遠不獲仰  
陪下列奉慰外朝無任瞻戀哀惶之至

為羣官請公除表

蘇頌

臣某等言伏奉今月二十日敕違此終喪未從權禮恭



惟聖旨相顧失圖臣某中謝臣聞孝德稱三事親之道不貳喪禮有五權制之儀居一雖霜露增惕君子有終身之悲而日月其除達人無追遠之義故大賢抑情而俯就不肖庶幾而企及百王同範千古不刊此所以定道喪此所以明大孝陛下欲乖前訓獨展因心棄易月之制申再期之禮臣何人斯輒敢裁議然凡聖殊貫尊卑異等情則無別服則不同漢朝故事行之自久是以先后遺旨具刊節制率土之濱孰不哀奉陛下若違衆

慮循私情想藥棘以纏悲服苴杲而增慕此則非先后之遺意也異通賢之達節也伏願俯依慘制以順權宜屈小節而存至公抑冲襟而明大禮則下願上達人欲天從陛下不違於先旨微臣得申於公議不任悲迫之至謹詣朝堂奉表陳請以聞

此篇原編在六百七卷今移入于此

為羣官固請公除表

臣某等言臣聞以日易月著自不刊之典以臣事君竊

惟有爭之義羣心累切聖感未迴臣等焦惶不安啓處  
中謝臣又聞之高宗諒陰三年不言百官總己以聽於  
冢宰斯則求古之人自殷宗行之矣但事有通變時有  
損益或循古法多昧遠圖孝文由是創禮孝景因之從  
令故漢之帝王獨高文景孝者先於百行豈欲違而致  
美誠以神器之重天下至公所直小所枉大加百姓而  
刑四海作程於後罔不率由陛下纂大橫之繇開中興  
之業每盱食坐朝求衣視事不可得不言也不可得總

已也固不可如殷之時也臣請以近事為明是云典故

豈三聖追遠曷不甚哉三年制服蓋未然矣先后一作王

所以末一作未顧之深一作除者欲順成先志不改其道乎

若遂乖於所奉固於執見寧獨神祇之望缺億兆之心

阻必當太宗有恨於昭陵之仙寢高宗不悅於梁山之

玄宮先后徒勤於憑几之言陛下是忘於綴衣之日矣

今禮云衷後聖不宜獨善今禮云非前王故以垂訓其

可專之乎况敬於宗廟四時之感斯在廢於禮樂萬邦

之化安寄不薦不孚久矣其如奉先何禮壞樂崩久矣  
其如致理何懼非大孝之意也頃公除有數臣等祇若  
今攢塗又畢時月已遠而陛下廷則簪裾之序居尚苴  
菜之容至有百蠻人覲千官在列仰晞太陽俾見羣下  
便謂君臣之禮舉而有二遐邇之人感且非一彼數事  
者伏惟熟計之臣等輒以悃悃之忠願抑蒸蒸之孝陛下  
下當迴思遷慮從權達禮思代天理物之大惟愛人治  
國之機上則遵於累聖稟於遺旨下則順此誠祈因而

俯就顛然所戴固不知幸無任悲迫惶悚之至謹詣朝堂奉表以聞

第二表

臣某等言臣以易服之禮著之前訓從權之義聞諸格言遂乃披瀝肝血願垂昭亮天心彌固日慮徒勤是用怔惶但深憔悴懼臣中謝臣聞通喪之制差等不同天子絕菽故云自達此孝情之與旨不疑作非喪服之遺事故雍言致惑子張發問於殷宗除服不疑元凱具陳於晉

主此則家國殊禮君臣異貫前帝軌儀備之方冊況皇  
朝典故駿命斯在祖宗奉先不違茲躅陛下若以庸言  
不信上則請按於周禮陛下若以今古異途此則請詢  
於唐典雖聖情多感臣不忍言而有義可憑終期俯察  
復以四海無外萬機事大國望時宗猶有權奪則陛下  
為天下主人父母司牧羣方纂膺寶業何忽以冕旒  
之貴而行布衣之禮也且臣等一作子公除虔奉明訓陛  
下若素帶未卷縞衣仍服使吉凶殊於內外丹素雜於

宮寢無乃哀樂乖宜乎無乃情禮失衷乎又臣以奉君  
為忠子以奉親為孝孝必順於先志忠必期於助禮今  
先后遺制服紀具存陛下小不忍行動而愈失陛下則  
固執僮違於大孝愚臣不請先陷於不忠臣何心顏敢  
安視息是以不勝悽悽崩迫之至謹詣朝堂固請以聞  
將加神龍尊號羣官請公除表

臣某等言臣聞君親之義臣子同極陛下至孝純深將  
固三年之典臣等盡忠懇到佇迴三舍之暉是則陛下



違先后之遺命臣等忤聖人之嚴旨違命幾於過戚不可以稱孝忤旨嫌於必諍不可以稱忠所以莫顧犯鱗共甘碎首臣等中謝臣又聞之王者代天理物為天所子循至公以臨大寶非獨善以崇小節由是漢之國章始從權以變禮晉之廷議故屈己以因除擁萬乘之尊有萬機之政者示不得同於凡也前王著於不刊其來久矣四聖則常追遠俯而就之陛下罔極之思道喪是執所不忍言莫之省奏遂令霜露多變日月其除皆臣

之至愚誠未感聖天意若曰助陛下以非常之功人謀  
協從尊陛下以非常之號者欲陛下司龍紀受龍圖祇  
分祉而建皇極擁神休而奉清廟者也故天有景既不  
可拒者審矣國有茂典不可廢者明矣鐘鼓不擊不足  
以旅庭冕旒不施不足以端宸未有膺其冊缺其儀乎  
臣等茫然悉未能喻况哀戚有制故非同日變通適道  
甫及載蕃誠宜奪因心之慕稽順時之請當建鴻名以  
承上帝則所直者大所枉者小罔不格于上下通於神

祇晞太陽之光曜乘和氣之充塞伏願陛下全之臣等  
昧死以聞期於必遂

此篇元編在六百八卷今入于此

為羣官請虞卒哭表

臣某等言臣等伏見有司撰既葬反虞之禮陛下當以  
今月二十七日公除卒哭聖情感慕所未忍言衆慮焦  
惶罔知攸寘中謝臣等謹按晉書杜預議畧曰天子之  
位至尊萬機之政至大羣臣之衆至廣不得同於凡人

故大行既葬祔祭於廟則因而除之不除羣臣莫敢故  
屈已而除之天下之人皆曰我王仁也我王孝也此乃  
聖制移風易俗之本於是盧欽魏舒等從其奏議莫不  
厭服臣等歷選列辟頗徵前史王者為天所子受天明  
命代天育物先天弗違居大寶之位行至公之道故沿  
革而致理變道以成政况先后之永願聖朝之舊式簡  
冊備矣方垂無窮君親臨之寧愛非禮而陛下愈遲  
見禮  
年記三問之痛孝思罔極履曾參之小節遺漢文之故事  
闕

貫於神明粵

自開闢天子之德未有如睿宗孝之純深也至使慶雲  
湧浪井出嘉木連理神芝三秀蓋其效歟要不可以情  
過哀而所枉斯大矣臣又聞七月而葬既葬殮除其月  
而虞既虞吉祭為之降殺用斷喪服示不得踰之今合  
於山陵祔於宗廟詢之典訓嘗有稽矣而終不師古始  
不易月考之事宜又無謂矣舉而書此將何以法陛下  
昧旦聽朝戚容深視庶官所以環拱近臣莫之利見戴

九天之仁覆渥十景之清光顯然之情蓋未能諭且追  
遠興感君子有終身之憂以權制服聖人思屈已之重  
何必三年之禮稱為百行之端若天無卑聽固違於獻  
歟臣敢先除今附於不義豈司牧黎獻作人父母之意  
乎伏惟陛下可羣司之奏順剛日之請去獨行以致美  
闡大猷以光濟勿使鴻生鉅儒廢一作發書而鬱悒下學  
上達空草議以屏營臣等至懷期必俯就則凡在動植  
無任悲幸謹昧死詣朝堂拜表以聞

代太原李僕射慰義章公主薨表

令狐楚

臣某言得進奏官

類表  
作院

狀報義章公主今月九日薨

朝七類表  
作三日者臣伏聞公主分輝帝籍擢秀皇闈麗有

掩於舜華纔成下嫁慶初傳於螽羽奄見一作上仙伏

惟陛下仁愛方深恩慈所屬始其凋謝軫以悲傷臣限

守邊陲忝聯枝葉不獲陪位奉慰無任哀塞悽愴戀結

之至

為杜司徒慰義陽公主薨表 劉禹錫

臣某言伏承義陽公主薨伏惟聖懷傷悼增切伏以公  
主妍姿令則冠絕天人稟教皇宮已挺柔嘉之德降嬪

卿族益彰貞粹之儀方期作範壺闈長榮邸第豈意遘

茲短壽奄謝昌辰慮陛下軫念未捐

類表作損

深慈莫遣有

虧常膳罷設宮懸臣子之情不任惕戀况聖凡禮異家  
國制殊伏願道齊彭殤理達修短割肌膚之愛慰寰海  
之心率土人臣孰不相賀

集作慰

無任懇款屏營之至



為王侍御瓘謝宣帛並賻贈表

李商隱

草土臣瓘言今月某日某官呂述某官任疇等至奉將  
聖旨以臣父某官某亡歿賜帛臣等并賻贈臣亡父布  
帛三百疋米粟二百石者大夜銜輝窮泉漏澤以殞以  
越終哀且榮臣某中謝臣先臣某託體元侯策名任子  
象賢傳劒餘力攻書歷七朝而在公秉二道而非墜氛  
興赤狄兵聚晉城先臣受律臨戎忘家狗衆士卒均食

罔媿於前修廊廡散金遠齊於舊說上憑王畧下振軍  
威旬月之間慶捷相繼並親桴三鼓躬運九章如臣弟  
兄皆冒矢石豈意竒功垂立大願莫從傳殮失時絡血  
成疾奄至凋落長違盛明此皆由臣等抱釁既深就養  
無素遂延家難仰惻宸襟尚偷生於晷刻亦何顏於天  
地伏惟皇帝陛下悼深撫机悲軫聞輦降憫冊於上公  
厚賻禮於遺體昔魏優死事止分食邑之餘漢養孤兒  
但有羽林之聚方於今日彼媿推恩叫號失容戴履無

所軍前結草必自於幽靈石上澆集作生松敢忘於遺訓  
無任感恩荒殞之至

為令狐博士緒補闕綯謝宣祭表

前人

草土臣某言今月某日中使某至奉宣恩旨致祭臣亡  
父贈司空臣某者存歿願終哀榮禮備荒迷觸地號叫  
瞻天臣某中謝臣先臣某生遇昌期早司國柄沒留懿  
德上惻宸襟特降王人迂臨私第陳其醴爵潔以豆登

招集作遺魄於幽陰旋歸莫覩視殘生於晷刻報効無

期臣等無任戴恩荒殞之至謹附中使某奉表陳謝以聞


賀順宗諡議表為人作

令狐楚

臣某言伏奉六月十四日敕旨太常奏大行大皇尊諡曰至德大聖安孝皇帝廟號曰順宗臣某誠感誠慶頓首頓首臣聞入廟觀德載在前言聞諡知行傳於故志伏惟順宗大聖安孝皇帝統承九聖保乂萬邦繼耀大

明合符真宰方同天以下覆俄厭代以上僊伏惟皇帝  
陛下哀慕未忘孝思罔極痛衣冠之永閔攀弓劍而無  
階殷薦鴻名光昭懿德廟號非徵於漢魏帝圖自掩於  
義軒百代見聖人之功四方知君子之孝率土臣子以  
欣以感臣限於鎮守遠在方隅不獲奔赴闕庭陪位稱  
賀無任踴躍之至

此篇元誤編在六百三十五卷狀門今移入于此



文苑英華卷五百七十一